



## SONRÚCHÁN POIST

### Cúntóir Taighde Gaois, Fiontar agus Scoil na Gaeilge Dámh na nDaonnachtaí agus na nEolaíochtaí Sóisialta Conradh ar Théarma Seasta suas le 18 mí

#### Ollscoil Chathair Bhaile Átha Cliath

Ollscoil óg, uaillmhianach, bhríomhar is ea Ollscoil Chathair Bhaile Átha Cliath ([www.DCU.ie](http://www.DCU.ie)) a bhfuil de mhisean aici ‘an saol agus an tsochaí a chlaochlú tríd an oideachas, taighde, nuálaíocht agus rannpháirtíocht’. Is fearr eolas uirthi in Éirinn mar ‘Ollscoil na Fiontraíochta agus an Chlaochlaithe’, agus tá sí tiomanta do chothú na tallainne, mar aon le haimsiú agus aistriú an eolais chun leas na sochaí agus an gheilleagair a chur chun cinn. D’ainmnigh *The Sunday Times* DCU mar Ollscoil Éireannach na Bliana in 2021.

Tá an Ollscoil lonnaithe ar thrí champas acadúla i gceantar Ghlas Naíon agus Droim Conrach i dtuaisceart Bhaile Átha Cliath. Tá breis agus 18,000 mac léinn cláraithe sna cúig Dhámh inti – Eolaíocht agus Sláinte, Scoil Ghnó DCU, Ríomhaireacht agus Innealtóireacht, Daonnachtaí agus Eolaíochtaí Sóisialta, agus Institiúid Oideachais DCU. Tá DCU tiomanta don fheabhas ina cuid gníomhaíochtaí uile. Léirítear sin trí na tionscnaimh thaighde ardscotha, a cur chuige ceannródaíoch um theagasc agus foghlaim, an bhéim a leagtar ar eispéireas claochlaitheach a chruthú dá cuid mac léinn, agus a deathionchar sóisialta agus eacnamaíoch. De thairbhe thiomantas sin na foirne acadúla agus na mac léinn, rangáitear DCU i measc an 2% is fearr d’ollscoileanna an domhain. Luaitear go rialta í i measc an 100 Ollscoil Óg ar domhan (sa *QS Top 70 Under 50* agus *Times Higher Top 150 Under 100* faoi láthair).

Sa *Times Higher Education University Impact Rankings*, rangáitear DCU san 84ú háit ar domhan – rangú ina meastar an chaoi a gcuireann institiúidí ardoideachais le Cuspóirí na Náisiún Aontaithe um Fhorbairt Inbhuanaithe. Le deich mbliana anuas, tá DCU ar thús cadhnaíochta i measc ollscoileanna na hÉireann i réimse aistriú na teicneolaíochta, i bhfianaise cheadúnú na maoine intleachtúla.

#### Forléargas ar Gaois, Fiontar & Scoil na Gaeilge

Is grúpa taighde é Gaois a bhfuil léachtóirí, taighdeoirí agus mic léinn iarchéime páirteach ann. Tá sé de mhisean ag Gaois acmhainní iontaofa nuálaíochta a fhorbairt chun teanga agus saíocht na Gaeilge a chothú agus a chlaochlú. Tá eolas faoi na tionscadail éagsúla atá faoi chúram Gaois le fáil ag [www.gaois.ie](http://www.gaois.ie).

#### Próifíl an Róil

Tá Cúntóir Taighde ar conradh á earcú ag Gaois, Fiontar & Scoil na Gaeilge chun oibriú ar thionscadal i réimsí na teicneolaíochta teanga agus an bhéaloidis. Beidh an Cúntóir Taighde ina bhall de mheitheal idirdhisceiplíneach a phléann le gnéithe den téarmaeolaíocht, den teangeolaíocht chorpais, den logainmníocht, den bheathaisnéisíocht agus den bhéaloidias, i measc réimsí eile.

#### Dualgais agus Freagrachtaí

- Gnáthobair eagarthóireachta ar na tionscadail chuí faoi threoir an Eagarthóra Taighde

- Tuairisciú go rialta ar dhul chun cinn na hoibre don Eagarthóir Taighde nó don Bhainisteoir Eagarthóireachta
- Aon bhac ar an obair nó aon athrú ar chóir a dhéanamh ar na spriocanna oibre a leagadh amach a phlé leis an mBainisteoir Eagarthóireachta nó leis an Eagarthóir Taighde
- Súil a choinneáil ar tháirgíocht agus ar spriocanna oibre agus iad a phlé go rialta leis an mBainisteoir Eagarthóireachta, an Eagarthóir Taighde agus an Téarmeolaí
- An Bainisteoir Eagarthóireachta a chur ar an eolas maidir le haon deacracht nó moladh eile a thugann sé/sí faoi deara
- Modhanna oibre a thaispeáint nó a léiriú d'fhoireann nua
- Obair eile a chur i gcrích, de réir mar is cuí, tar éis dul i gcomhairle leis an mBainisteoir Eagarthóireachta nó leis an Eagarthóir Taighde

#### **Cáilíochtaí agus Taithí**

- Bunchéim onóracha sa Nua-Ghaeilge nó in ábhar gaolmhar cuí
- Gaeilge líofa mar aon le caighdeán ard cruinnis sa Ghaeilge scríofa
- Bunscoilleana ríomhaireachta
- Taithí ar bheith ag obair mar chuid de mheitheal
- Bheith dea-eagraithe agus in ann tionscanta a léiriú agus spriocanna a chomhlíonadh
- Scileanna idirphearsanta láidre

D'fhéadfadh tástáil scríofa sa Ghaeilge a bheith ina cuid den phróiseas earcaíochta.

#### **Oiliúint Éigeantach**

Ní mór don sealbhóir poist an oiliúint chomhlíonta éigeantach seo a leanas a chur i gcrích: Ionduchtú, Sláinte agus Sábháilteacht, Maoin Intleachtúil agus Cosaint Sonraí. Féadfaidh gur gá tabhairt faoi oiliúint eile nuair is cuí.